

O DOKUMENTU

Bosna i Hercegovina ne smije ostati po strani globalizacijskih promjena među koje spada i stvaranje modernog informacionog društva baziranog na intenzivnom korištenju znanja i informacija, ali i informaciono-komunikacionih tehnologija (IKT) u svakodnevnom životu. Nadalje, procesi informatizacije i promjene ne smiju se odvijati stihijski, nego je potrebno – koristeći se iskustvom drugih država – te procese usmjeravati i razvijati.

U tom smislu je Vijeće ministara Bosne i Hercegovine pokrenulo pripremu politike i strategije razvoja informacionog društva u BiH kao ključnih strateških odrednica na osnovu kojih će BiH djelovati na razvoju informacionog društva.

Politika razvoja informacijskog društva Bosne i Hercegovine jeste okvirni i bazni dokument, na osnovu kojeg će se, u procesu razvoja i izgradnje informacionog društva, moći donositi zakoni, propisi i drugi akti, te odlučivati o smjerovima razvoja, akcionim planovima i prioritetima na nivou Bosne i Hercegovine i njenih entiteta.

Politika propisuje i pripremu strategija razvoja informacionog društva, po razvojnim područjima (IKT infrastruktura, IKT industrija, ePoslovanje, eObrazovanje, eZdravstvo, eUprava, pravna infrastruktura i informaciono društvo i održivi razvoj).

Strategija razvoja informacionog društva koja je pripremljena na osnovu Politike, sadrži strateška opredjeljenja u 5 razvojnih stubova:

- Pravna infrastruktura
- eObrazovanje
- eUprava
- IKT infrastruktura
- IKT industrija

Strategija daje smjernice u kojim treba djelovati. Međutim, ona ne smije biti «mrtvo slovo na papiru». Ona mora biti propraćena odgovarajućim Akcionim planom razvoja informacionog društva.

Ovaj dokument sadrži Akcioni plan razvoja informacionog društva u Bosni i Hercegovini.

Akcioni plan nudi platformu po kojoj će se Strategija sprovesti u praksu. On definiše programe, projekte i inicijative za koje se smatra da su u tolikoj mjeri važni za razvoj informacionog društva da se predlaže direktna podrška za njih od strane Vijeća ministara i entitetskih vlada. Oni su u suglasju sa strateškim pravcima definiranim u Strategiji, a samim tim i sa opštim principima, preporukama i pravcima razvoja definiranim u Politici razvoja informacionog društva Bosne i Hercegovine.

Uvijek su u pitanju razvojne aktivnosti, odnosno one koji direktno potiču sveobuhvatan razvoj informacionog društva, i to u skladu sa Strategijom.

Svaka od aktivnosti je specificirana kroz skicu projektnog zadatka, a različitog su nivoa kompleksnosti:

- **Strateški multidisciplinarni programi** postavljeni na državnom nivou koji su od esencijalne važnosti za razvoj informacionog društva;
- **Razvojni programi** postavljeni u cilju ojačanja i razvoja određenog IKT segmenta (obrazovanja, infrastrukture, itd.);

- **Razvojni projekti** usmjereni na realizaciju konkretnih ciljeva ili produkata, ali od šireg značaja za informatizaciju društva (npr. uspostava elektronske identifikacijske kartice, digitalizacija medija i slično);
- **Pilot projekti** koji su usmjereni na implementaciju konkretnih specifičnih rješenja, ali u cilju prihvatanja nekih rješenja kroz evolutivni razvoj (npr. eksperimentalno uvođenje elektronski podržanog obrazovanja i sl.).

Aktivnosti su smještene u vremenski okvir i dati su prioriteta. Aktivnosti su prioritetizirane relativno jedan u odnosu na drugu, a sve navedene aktivnosti se smatraju prioritetnim u širem kontekstu.

U skicama projektnih zadataka definirani su i nosioci i učesnici aktivnosti. Vladine institucije su često nosioci aktivnosti, ali ne nužno. Akcioni plan nije ograničen na skup aktivnosti kojima će Vlada implementirati i poticati razvoj informacionog društva, njega treba posmatrati kao plan koji sadrži aktivnosti kroz koje se razvija informaciono društvo u BiH i to od strane svih društvenih subjekata (Vlada, državne kompanije, privatni sektor, javne institucije, donatori, nevladine organizacije, međunarodna zajednica, pa i svaki pojedinac).

Pored specifikacije aktivnosti, definiran je i benčmarking sistem za praćenje razvoja informacionog društva u BiH. On je dat kroz specifikaciju skupa indikatora koje treba pratiti. Za svaki od indikatora, definirano je:

- Opis indikatora
- Važnost indikatora
- Izvori podataka za konstrukciju indikatora
- Način i frekvencija prikupljanja podataka
- Procjena težinskog faktora, validnosti i dostupnosti indikatora

Akcioni plan se odnosi na period 2004 – 2010.

Naručilac dokumenta je Vijeće ministara Bosne i Hercegovine.

Dokument je pripremljen u suradnji sa Razvojnim programom Ujedinjenih nacija (UNDP) za Bosnu i Hercegovinu.